





43.2355  
2.528  
= 1.66



**TIFFEN** Color Control Patches  
© The Tiffen Company, 2007


靜志居詩話卷十二

秀水朱竹垞先生著

柯維騏字奇純莆田人嘉靖癸未進士官南京戶

部主事有藝餘集

扶荔山房編輯



宋遼金元四史惟金史差善其餘潦草牽率豈金匱石  
室之所宜儲希齋撰新編會宋遼金三史為一以宋為  
正統遼金附焉升瀛國公益衛二王于帝紀以存統正  
亡國諸叛臣之名以明倫列道學於循吏之前以尊儒  
歷二十載而成書可謂有志之士矣其詩文曰藝餘者

編宋史之暇作也先是揭陽王昂撰宋史補台州王洙撰宋元史質皆畧焉不詳至柯氏而體稍備其後臨川湯顯祖義仍祥符王維儉損仲吉水劉同升孝則咸有事改修湯劉橐尚未定損仲宋史記沉於汴水余從吳興潘氏鈔得僅存然三史取材紀傳則曾鞏王偁杜大圭彭百川葉隆禮宇文懋昭編年則李燾楊仲良陳均陳桎禮樂則聶崇義歐陽修司馬光陳祥道陳暘陸佃鄭居中張暉職官則孫逢吉陳騏徐自明輿地則樂史王存歐陽忞稅安禮王象之祝穆潘自牧著錄則王堯

臣晁公武鄭樵趙希弁陳振孫類事則徐夢莘孟元老李心傳葉紹翁呂中馬端臨趙秉善劉祁述文則趙汝愚呂祖謙諸書具在以予淺學亦曾過讀其他宋金元人文集約存六百家郡縣山水志以及野史說部又不下五百家及今改修文獻尙猶可徵予嘗欲據諸書考其是非同異後定一書惜乎老矣未能也

豐坊字存禮鄞縣人嘉靖癸未進士除禮部主事

以吏議免官家居坐法竄吳中改名道生字人

翁有南禺集

南禺釋褐後從其父學士熙諫大禮受杖闕下人方謂  
學士有子矣逮父卒成所乃言非父本意忽走京師上  
書請追崇興獻王宜稱宗人太廟永陵用其言而不錄  
其人也歸益狂誕恃才傲物作偽欺人撰子貢詩傳申  
培詩說魯詩世學古書世學石經大學竄易經文別裁  
異議一時若泰和郭氏京山李氏澄海唐氏多惑之而  
不知本邪說也芝園一序可當聲罪檄而憐才美意實  
寓其中此等人第作犬豕相遇可耳詩不必存錄而論  
列之期以祛後人之惑也

附錄張惟靜云存禮質稟靈奇才彰卓詭論事則談  
鋒橫出摘詞則藻撰立成士林擬之鳳毛藝苑方之  
逸駟然而性不諧俗行或盃中片語合意輒出肺肝  
相啗睚眦蒙嗔卽援戈矛相刺亦或譽嫫母爲嬋娟  
斥蘭荃爲蒼莖旁若無人罕所顧忌知者以爲激詭  
不知者以爲窮奇也由是雌黃間作轉相詆謔出有  
爭席之夫居無式閤之敬鵠衣纏縷溼突不炊僮奴  
絕粒而逋亡賓客過門而不入顛頡窮獨以終其身  
不亦悲夫

陸埏字秀卿嘉善人嘉靖丙戌進士累官右僉都御史巡撫河南有箕山集

嘉靖初吾鄉詩人漸山而外有菁山箕山漸山集選家恒多采錄兩公詩或見遺謄諸圖繪漸山丹青兩公水墨鑒賞者好有不同非畫品有高下爾

呂希周字師旦崇德人嘉靖丙戌進士歷官通政司使有東匯詩集

東匯於詩亦沾沾自喜其集不甚傳由其子請論定于陸武惠也同里曹秋嶽侍郎博徵文獻集明三百年名

公卿手書墨蹟裝潢成冊多至七百家東匯雜詩在焉比集中所載者較勝亟錄之侍郎沒後古林書畫散作雲煙曩之過眼者不復再觀矣可惜哉

華察字子潛無錫人嘉靖丙戌進士選庶吉士改戶部主事歷兵部郎中再改翰林院修撰遷侍讀學士掌南院有巖居橐

學士豐於貲纖纖務齋晝夜持籌不知吟咏性情何由超詣乃爾次韻答僅初見寄云地僻畏風雨入春長掩扉一從還山後又見梨花飛世事多貝錦故人猶布衣

青志身言詩 卷十二  
四  
瑤琴勿輕奏山水知音稀

屠應峻字文升平湖人嘉靖丙戌進士選庶吉士  
改刑部主事調禮部歷員外郎中仍改翰林修  
撰陞侍讀進春坊右諭德有蘭暉堂集

諭德取材六代具體初唐爛若春葩將以秋實是衆作  
之有滋味者

王格字汝化京山人嘉靖丙戌進士選庶吉士出  
知永新縣陞刑部主事調戶部歷員外郎中出  
爲河南僉事會南巡行宮火逮獄削籍久之授

太僕寺少卿有少泉集

少泉矢口信筆不費推敲合作者寡并非洞庭漁人之  
比南風自此繼夢澤而代興者鮮矣燈夜曲云千金一  
刻此芳春况復天邊月色新曲巷小橋隨意去明燈何  
處不畱人

陸粲字子餘一字浚明長洲人嘉靖丙戌進士選  
庶吉士改授工科給事中坐劾張桂謫都勻驛  
丞遷永新知縣有貞山稟

嘉靖間元老類皆延攬賓客雖貴谿分宜亦然惟張桂

專與文士爲讐丙戌庶常一筆盡掃貞山又多論劾困抑終身然晚極田廬文酒之樂菽園著述傳誦藝林比之二柄臣孰得孰失邪

石文睿字文思台州寧海人嘉靖丙戌進士除太常博士有白山集

文思詩未成家然如寒生紅葉兩秋老白蘋江高塔靜觀塵土界老僧聞數廢興年正是不俗

江以達字于順貴溪人嘉靖丙戌進士授刑部主事歷郎中出爲福建僉事轉湖廣提學副使有

午坡集

午坡以北地文出廬陵眉山之上又謂昌黎詩不逮文尚沿習氣胥臺贈詩云賦窺宋質室詩登潘陸堂不免阿其所好矣

聞人銓字邦正餘姚人嘉靖丙戌進士除寶應知縣擢山西道御史巡兩關歷湖廣按察副使有芷蘭集

邦正著錄陽明之門撰飲射圖解又雕劉昫舊唐書行世津津好古不易得也句如花落雨餘風吹寒食寒

情味不淺

田汝成字叔禾錢塘人嘉靖丙戌進士授南京刑部主事繇員外轉禮部郎中出爲廣東提學僉事左遷滁州知州陞貴州僉事遷廣西左參議有豫陽集

叔禾挾黃勉之徧游武林諸山互相酬和撰西湖遊覽志及志餘亦稱好事惜中興館閣錄都城紀勝武林舊事夢梁錄咸淳臨安志大滌洞天紀諸書皆未寓目未免挂一漏十耳詩品在范菁山江午坡間

樊鵬字少南信陽人嘉靖丙戌進士歷官陝西按察僉事有樊氏集

望之少南同爲仲默鄉井絮短論長少南差勝

袁袞字永之吳縣人嘉靖丙戌進士選庶吉士改授刑部主事調兵部坐失火下詔獄謫戍湖州用薦補南京兵部員外出爲廣西提學僉事有胥臺橐

永之詩品在后岡之上足與吾鄉漸山方駕報顧東橋書云立言之道其難有六學難乎淵該事難乎綜覈辭

難乎雅健氣難乎冲和識難乎貫融志難乎沉澹兼是  
六能而假以歲月庶矣古之立言者率多中歲蓋少年  
輕俊聞見未廣計慮未周詞鋒則銳而論議剽捷終乖  
軌轍今讀胥臺集多中歲之詩宜其聲旣清會辭亦藻  
拔也

范言字孔嘉秀水人嘉靖丙戌進士授蒲圻知縣  
改保定儒學教授歷國子監丞陞大理府同知  
有菁陽集四音存橐

菁山先生不畏強禦爲國子監丞時嚴世蕃著紅袴入  
上舍先生夏楚撻之分宜次日造門謝未幾而大理丞  
命下矣嘉靖初吾鄉稱詩必以先生爲巨擘屠諭德漸  
山長歌云菁山先生真崛奇文章垂世光陸離懸黎結  
緣世莫識陽春白雪和者希是時漸山詩名籍甚顧人  
室稱弟子焉

趙時春字景仁平涼人嘉靖丙戌進士選庶吉士  
改兵部主事以建言下獄尋補翰林編修又以  
上疏放歸會邊警起領民兵自副使超拜右僉  
都御史巡撫山西有浚谷集

景仁慨當以慷如擊唾壺不必中節送陶虞卿赴神機  
參將云宋殿三衙帥唐環十六軍官聯參斗柄旌旆儼  
星文羽衛迎黃道龍光觀紫雲時時仙仗入清蹕早應  
聞畱滯一律云畱滯滄洲已浹旬鷓冠終日滿風塵浮  
雲何事來還往歲月無情秋復春海甸中宵來驛使天  
涯盡處未歸人不堪對酒翻惆悵翠篠黃花幾度新

王慎中字道思晉江人嘉靖丙戌進士除戶部主  
事改禮部復改吏部歷員外郎中謫常州通判  
稍遷南戶部主事轉禮部員外陞山東提學僉

事歷江西參議河南參政有玩芳堂摘橐遵巖  
家居集

劉淵材憾曾子固不能詩余嘗見宋人所輯唐宋八家  
詩韻則子固與焉不得謂非詩家矣評明人詩者不及  
王道思然道思五古文理精密足以嗣響顏謝而論者  
輒言文勝于詩非知音識曲者也十二夜月與張子同  
玩感述云高旻蕩浮翳仲冬淑氣清良夜何未央憇坐  
臨前楹舒景揚雲端皓魄委廣庭灑英鮮瑤席華彩鑿  
雕樨稍稍風露重微微河漢明眷茲泰宇寬展席諧芳

朋撫景遺俗迫卽事寡氛嬰豈惟祛煩積亦以湛心靈  
戒盈君子德和光達士情葆曜貞有孚養晦善自名

羅洪先字達夫吉水人嘉靖己丑賜進士第一授

翰林修撰進左春坊贊善罷爲民隆慶初贈光

祿寺少卿諡文恭有念菴集

達夫遠師擊壤近仿白沙定山然爽氣尙存未墮塵霧

獨坐云數月不出戶庭前多夕陰閒看芳樹色一倍舊

年深山中雜詩云問我家何在山深多白雲巖前飛瀑

下對語不相聞後園續詠云棠梨花開深淺黃燕子初

飛日漸長草亭坐久客不到半雨半風春太狂南村雲  
起北村晴晴鳩雨鳩更互鳴東風吹雨衣不溼我在桃  
花深處行

唐順之字應德一字義修武進人嘉靖己丑進士

除兵部主事改吏部尋改翰林編修歷右春坊

司諫上疏請朝東宮奪職爲民起兵部郎中巡

視薊鎮還視師浙直超拜僉都御史巡撫淮揚

天啓中追諡襄文有荆川先生集

荆川開濟之才閎覽百家靡不融會毅然自任天下之

重倭人構患志在捍牧圉以保鄉曲是時督師之權惟  
甬江梅林是寄公舍當局二人誰可與談方畧者顧不  
知者以公爲甬江所薦介溪所知因此薄公豈惟昧于  
知人并不識時務者矣其建平倭之策謂當禦之海外  
故北自崇明南至蛟門乘桴破浪身作先鋒積勞而殞  
是豈專馳騫于功名者邪襄文之諡允符公論也已公  
初與遵巖論文兩不相下既乃舍所學從之竊怪集中  
五言古詩特少殆退舍以避遵巖也至于律詩質不傷  
文麗而有體

附錄胡元瑞云嘉靖初爲初唐者唐應德袁永之屠  
文升王汝化任少海陳約之田叔禾等爲中唐者皇  
甫子安華子潛吳純叔陳鳴野施子羽蔡子木等俱  
有集行世就中古詩冲澹當首子潛律體精嚴必推  
應德 愚山云應德子學無所不窺大則天文樂律  
地理兵法小則弧矢勾股壬奇禽乙刺鎗拳棍莫不  
精心叩擊究極原委以資其經濟有用之學晚而受  
知分宜僇力行間身當倭寇轉戰淮海受事未幾遂  
以身殉可謂志士者也正嘉之間爲詩者踵何李之

後塵剽竊雲擾應德與陳約之輩一變為初唐於時  
稱其莊嚴宏麗咳唾金璧歸田以後意取辭達王李  
乘其後互相評砭吳人評其初務清華後趨險怪考  
其所撰若出一轍非通論也

李開先字伯華章邱人嘉靖己丑進士除戶部主  
事改吏部歷員外郎中擢太常少卿提督四夷  
館罷歸有閒居集

中麓撰述潦倒恂疎然最為好事藏書之富甲于齊東  
詩所云豈但三車富還過萬卷餘又云借抄先館閣博

覽及瞿曇是也先時邊尚書華泉劉太常西橋亦好收  
書邊家失火劉氏散佚無遺獨中麓所儲百餘年無恙  
近徐尚書原一購得其半予嘗借觀愛籤帙必精研朱  
點勘北方學者能得斯趣殆無多人也噫嘻文淵閣藏  
書例許抄覽先具領狀以時繳納世所稱讀中秘書蓋  
謂是已奈典籍徵員收掌不慎歲久攘竊抵換已鮮完  
書可為浩歎聞中麓後人尚餘殘書數十部巡撫丹徒  
張公物色之中有陸農師禮象一編張公歿後訪之不  
能得矣

呂高字山甫丹徒人嘉靖己丑進士授戶部主事  
改兵部歷郎中出爲山東提學副使轉行太僕  
少卿有江峰漫稿

詩莫盛於正德文莫純於嘉靖之初自後七子派行而  
真詩亡古文亦亡矣山甫與富順熊過叔仁名在八才  
子之列雖未能驟乘王唐亦一時之雋也王浚川數當  
時作者有唐子羅子趙子玉子江右則有尹子曾子胡  
子陳子尹名臺字崇基有洞山集陳名昌積字子虛有  
龍津集曾胡二子不能悉舉矣

陳束字約之鄞縣人嘉靖己丑進士選庶吉士改  
授禮部主事已復改編修出爲湖廣僉事徙福  
建轉河南提學副使有石岡集

約之取組六朝亦稱典則咸寧山中雪霽晚行云雪霽  
乍見山殘陽稍辭嶺暝色起烟氣寒光散墟井田空獵  
犬還林凍棲鳥警遙聞野寺鐘初月生俄頃還浙夜泊  
江口云越嶂宜春望江舫入夜乘潮移諸島出雲卷數  
峰層近郭翻多戀還家獨未能北堂今夕夢先已度西  
興送李子云山城細雨綠蕪滋黃鳥關關送別時海內

爲鄰千里近湖邊傾蓋十年遲蟬聲驛路催官騎草色  
河橋映酒旗遙想經行多逸興逢人莫不寄新詩

任瀚字少海南充人嘉靖己丑進士繇吏部主事

補春坊司直兼翰林檢討有忠齋稟

少海遇青城山異人授鴻寶修煉法家中盤盞皆黠汞  
銀爲之同時熊叔仁亦好服食煉形之說而羅達夫之  
死燕齊海上之士或言其仙去是時青詞丹籙西內尙  
未營齋而諸君愛道實開其先已少海老去自吹秦感  
栗西征曾比漢嫖姚之句詩家類多稱之

楊爵字伯修富平人嘉靖己丑進士除行人擢河

南道監察御史上書劾夏言郭勛因極言朝政

廷杖繫獄者再久而得釋卒追諡忠介有斛山

集

斛山手觸逆鱗甘以其身顯棄封事大畧謂目前之憂  
甚大大抵因仍苟且兵戎廢弛公私困竭奔競成俗賄  
賂通行遇災變而不憂非祥瑞而稱賀讒諂面諛士風  
民俗於此大壞而國之所恃以爲國者埽地盡矣又云  
天下之患莫大乎以危爲安以蓄爲利實則可憂而以

爲可樂法家佛士日遠而快意肆情之事無敢有齟齬于其間積弊而至于蠱則不可得而救矣永陵見之震怒下鎮撫司重笞下獄于時晉江周主事天佐救之而死文登浦御史鋋再救之而又死繫獄五稔始得釋纔旋里永陵復諭東廠拘之斛山之在獄也校尉蘇宣喬某楊棟獄官洪百戶咸哀焉及再被逮緹騎亦憐之不相促迫斛山飯已卽行立門屏前傳語家人曰有旨見逮吾行矣觀者流涕獄中撰周易辨錄其論文云文以理爲主以氣爲輔不以偏邪之見亂其心本諸聖賢之

言以充養之如此則造語皆自胸中流出其吐詞立論愈出愈新而無窮如日月在天窮居深谷花石草木之微青者自青白者自白仰之以生輝觸之而成色矣旨哉言乎詩則信口而作不求工也

林恕字道近長樂人嘉靖己丑進士歷官雲南按

察使有西橋集

西橋近詩依然林子羽王安中流派舟次白沙驛云長安何處所孤櫂發閩關白擁沙邊驛青迴江上山風濤添別淚村酒破愁顏羨爾溪中鳥閒雲共往還宿唐浪

村云黃精釀熟豆初花籬落蕭疎遠市譁地僻虞羅依  
岬曲天寒漁火旁江又燕尋舊壘穿重幕竹引新篁過  
別家對景蕭然幽興發可甘萍梗負年華

楊祐字汝承錢塘人嘉靖己丑進士有丹泉集

汝承諸體瀟灑拔俗今鄉鄙論詩無人屈一指者可歎  
也湖夜五律云湖夜熒熒白蘋風嫋嫋秋斷霞斜照雨  
冥霧溼依樓萬國仍多難淨生祇百憂滄江有漁笛何  
事獨悠悠九日登泰山云殊方此日逢重九絕嶽高吟  
散遠愁漢時秦封空往事紫萸黃菊自深秋天清樓閣  
共悠悠

吳子孝字純叔長洲人尙書一鵬子嘉靖己丑進  
士改庶吉士授工部主事以光祿寺丞出爲湖  
廣參議提督太和山有玉涵堂稟

純叔籍甚詩名特格未高聳其論詩云世之蕘童牧豎  
矢口而成章田翁野嫗發聲而中節彼蓋不知何者之  
爲詩况詩之所以妙何也天地之機洩之于人者不知  
其所以然而然也夫詩以言傳亦以言隱求之于迹者

非也求之于音者亦非也求之于揣摩擬議者亦非也  
數語足當正嘉詩人鍼砭

沈謐字靖夫秀水人嘉靖己丑進士除行人擢吏

科給事中終江西按察僉事有石雲家藏集

先生師於陽明甘泉友于龍溪窮研理學故其詩品亦  
在元豐淳熙之間游殊勝寺云晝舫連雲動驚濤帶雨  
飛青山天外出白鶴寺邊歸僧偈傳金粟蟬聲隱翠微  
洞庭乘興遠直欲老漁磯

周顯宗字子孝濮州人嘉靖己丑進士除秀水知

縣歷官漢中知府有桃村山人自適橐

桃村於詩未臻門徑惟意所之自序稱感興而作不事  
強索亦未嘗規規于古人自知之明亦已審矣集中絕  
句小詩有偶合者宿安平驛云湖靜水初合人喧市晚  
收夜深誰共語寒月獨登樓

張意字誠之崑山人嘉靖己丑進士官南職方郎

有日涉園橐

誠之與兄情後先取甲第情有公餘寓拙橐詩無足錄  
者自序以爲習氣未除興到輒就不求其工自適其適

可謂得失寸心知者也

孔天允字汝錫汾州人嘉靖壬辰賜進士第二以

王府親外補陝西提學僉事歷浙江右布政使

有文谷集

管涔山人如新調鸚鵡雖復多言舌音終是木強

蔡汝楠字子木德清人嘉靖壬辰進士除行人遷

南京刑部郎中出知衡州府歷江西參政山東

按察使擢兵部侍郎改南京工部有自知堂橐

白石詩名藉甚與四皇甫相酬和唐應德亟賞之云白

石今之名家也一變而得古作者之精僕非知音亦三  
歎不能自己而其鄉錢守中撰竹里老人沈宗殷傳備  
述正嘉之際湖州人物之盛有云長興則吳布衣琬安  
吉則陳大參良謨烏程則凌訓導震歸安則嚴知府鳳  
吳知縣廉唐主事樞德清則沈僉事松武康則駱編修  
文盛而劉尙書麟自江右至居蒙鳩孫山人一元自陝  
西至居戴山云云獨不及白石何與

范欽字堯卿一字安卿鄞縣人嘉靖壬辰進士累

官兵部右侍郎有天一閣集

堯卿格律自矜第取材太近時倡和者沈嘉則呂中甫諸人未免聲調似之其藏書最富今浙中舊族若山陰鈕氏祁氏吳興潘氏沈氏樵李項氏郁氏高氏胡氏遺書盡散惟范氏籤帙尙存惜未能泝江就閱也

顧存仁字伯剛太倉州人嘉靖壬辰進士除餘姚知縣入爲禮科給事中以言事廷杖編管保安隆慶初起用官至太僕寺卿有東白草堂集

陸子餘劾張桂作奏時鬼嘯于庭顧伯剛起草則鬼近榻前其聲迫矣詰旦鴉又鳴戶上而兩公直言不諱雖

受廷咎未嘗殞命使有畏縮何以成名乎伯剛所言五事其一論及黃冠故答鴻山漸山詩有潮海空傳佛骨書之句也是時金錄青詞猶未盛而徒薪曲突君子重其知先幾焉

周復俊字子籲太倉州人嘉靖壬辰進士仕至太僕寺卿有六梅館集

子籲甄綜鄉黨之詩爲玉峰詩纂而以己詩請楊用修評點亦稱好事第諸體多膚淺不足觀

王梅字時魁平湖人嘉靖壬辰進士選庶吉士除

刑部主事謫判滁州有柘湖集

柘湖風神韶亮得無累之神絕句小詩尤見清拔送林  
節推赴任瓊州云見說瓊州地烟中疊浪開遠天分島  
激晴蜃結樓臺水館鮫人識風檣買舶來枕椰秋樹好  
莫怨夜猿哀登滁州城云淮北淮南節候同荒臺無限  
北來鴻愁成短夢青山外倦倚高城夕照中雲樹不堪  
連海岱商歌何處起秋風橫塘寂寂蘋花老欲采寒香  
薦醉翁題畫云渺渺平蕪淺淺沙垂楊疎處見人家二  
年京洛緇塵滿愛殺芳洲杜若花

尹耕字子莘蔚州人嘉靖壬辰進士由兵部郎中  
出知河間府升河南按察僉事坐劾戍遼左有  
朔野集

李何詩派竝行曾未幾時而學李者漸少宗何者日多  
學李得其風骨者前有凌溪後有朔野而已朔野以邊  
才自負一蹶不振坎壈而終詩如曉角秋笳聽者悽楚  
韓淮陰侯廟云背水空留陣良弓早見收身危緣震主  
面相止封侯落日荒祠道西風澗水秋君臣終始義爲  
爾淚長流秋興云銅龍春闕曉光寒金水橋橫白玉欄

見說漢皇求大藥故邀王母到長安黃金夜獻文成竈  
青鳥朝翔太乙壇不是歲星陪帝輦蟠桃誰奉殿中歡  
薊門千里接雲中燧火清宵警報同合陣幾窺青海月  
鳴鞭爭下黑山風殘冬戰士衣仍薄荒歲孤城廩欲空  
南國十年輸輓盡防秋諸將漫論功十萬鳴弦報吉囊  
野心狼子是花當連姻故自輕中國分道頻看入漢疆  
推穀丈人空肉食操戈遺孽尙蕭牆不應干羽修文日  
歲歲三關有戰場威名萬里馬將軍白首丹心天下聞  
遼水旌旗餘殺氣泰山松柏已高墳條侯自靖中州變

竇憲會銘塞外勳獨倚凌烟思將畧暮天征雁下寒雲

桑喬字子木江都人嘉靖壬辰進士除戶部主事

改授監察御史駕幸承天扈從未行乞歸逮赴

詔獄廷杖謫戍九江卒戍所隆慶初贈光祿寺

少卿有詩文集

子木按大同還一日劾四尙書嚴嵩與焉可謂敢言矣  
然幾殺其身得不死者幸爾歐楨伯撰廣陵十先生傳  
十先生者儲瓘靜夫王軌載卿景暘伯時趙鶴叔鳴朱  
應登升之蔣山卿子雲曾銑子重朱曰藩子价宗臣子

相其一則子木也

包節字元達華亭籍嘉興人嘉靖壬辰進士除東  
昌推官徵授監察御史出按湖廣抗疏劾守陵  
大瑞廖斌不法爲斌反誣下詔獄謫戍莊浪衛  
有臺中渥中二集

侍御悅研風雅以文苑英華詩可續昭明文選體編成  
苑詩類選三十卷亦稱好事其所作大約取材于是西  
谷張氏惜其立志太銳任事太勇嫉惡太嚴爲讒者所  
中才與命妨志與時違故所就止是亦知己之言也九

日宴西寧城樓云九日依邊郡登高倍黯然山風寒擁  
葉城日澹浮烟菊亦窮荒見萸應故國偏何期流竄客  
猶接歲時筵贈俠少年云早隨飛將戰龍沙日晚收營  
過狹斜下馬直趨盧女肆滿樓喧笑擁琵琶

馮汝弼字惟良平湖人嘉靖壬辰進士工科給事  
中以言事謫潛山縣丞遷知太倉州調揚州府  
同知不赴隆慶初追贈布政司參政有祐山集

祐山入諫垣值汪尚書鋡掌吏部恃寵恣肆言官劾之  
不動祐山投袂起曰擊之不勝則其志益驕事有不可

言者吾當以死爭之疏入帝怒時禮科給事中揭陽蔡宗愷河南道御史泰和曾翀皆廷杖死祐山與諸暨翁給事溥等八人俱外謫然翁終以此逐斯隆慶初有追贈之典也祐山歸田後睦鄰敦俗鄉里德之曾孫孝廉洪業守其家法輕財博施至今東湖言好義者必曰馮氏

王畿字汝中紹興山陰人嘉靖壬辰進士官南京武選主事有龍溪集

龍溪學術不純詩亦駁雜登西天目云早起登山去芒

屨結束牢但令雙足健不怕萬峰高

高世彥字仲修號白坪內江人嘉靖壬辰進士有

自得齋稟

白坪軒名自得其詩意象從容五言如羣鷗穿藻出一鳥捕魚飛月令如潮信年光似水流白雲棲樹杪青竹露牆根瑤瑟難爲調牙籤剩有書潮來沙作篆雲過石爲衣七言如對月云佳辰若此不易得良夜何其分外明九日云清時容我林泉嬾黃菊笑人塵務勞自娛云花陰數酌陶元亮日課一詩梅聖俞蜀中尙楊用修派

詞多穠郁而其詩清潤如此所當洗眼觀也

何維柏字喬仲南海人嘉靖乙未進士改庶吉士

授監察御史坐劾嚴嵩廷杖累官南京禮部尙

書諡端恪有天山草堂存橐

端恪詩多雜講學語合格者希其乞休作云樂事尙饒  
新歲月勝游不改舊雲山侍其父與鄉人爲九老會亦  
佳話也

孫植字斯立平湖人嘉靖乙未進士除南京刑部

主事累官刑部尙書諡簡肅

簡肅家誠頗嚴諸子析箸後命每夕各出盤蔬榼酒共  
飲飲必分題賦詩其意以爲兄弟日親則妻妾之言不  
得而間蓋亦具苦心矣公之先名固者元處士有詩名  
聽雪齋集嘉隆間會鏤板惜也今其子姓莫有儲藏者  
許穀字仲貽上元人嘉靖乙未進士除戶部主事

改禮部轉吏部郎中遷南太常少卿謫浙江運  
副起爲江西提學僉事陞南尙寶卿有外臺武

林省中歸田諸橐

石城詩頗近大歷十子畫鹿行云古來寫鹿誰最賢邪

律以後皆無傳吾鄉近推快園叟毫端物態俱天然快  
園野叟氣豪蕩此圖全得山林象疑從靈囿翻然來走  
入君家錦堂上元圃平開藥草生靈泉倒瀉溪流清溪  
邊跂跂似求侶草畔泚泚如有聲野叟風流不可見綵  
筆貽君足珍玩霜毫豈羨芙蓉園銅牌未數宜春苑憐  
君自是全生者百年意興惟原野世路逃名不受羈雲  
厓結伴寧相捨予本江南一散人悔將書劍誤風塵披  
圖便欲捐簪珮共採苹蒿樂性真偶成云新作魚鹽吏  
遙辭龍虎都乾坤無棄物江漢有潛夫短笠三山雨扁

舟八月鱸茲懷何日遂把酒意踟蹰

王維楨字允寧華州人嘉靖乙未進士選庶吉士

授檢討歷修撰諭德陞南京國子祭酒以省母

歸值地震陷死有槐野存笥集

王允寧孫仲可皆學杜而不得其門允寧自詡七律然  
尤懦鈍五言有句無篇如千里秋江水孤舟月夜吟高  
林風葉下遠渚薄雲低花樹迷官路濤聲入縣門山無  
雲斷處塔有雁來時三疊尊前酒雙旌畫裏身暮雲迷  
遠岫春棹響空江天險分秦塞神謀度漢兵尙泠然可

誦也允寧死於地震謗者謂獲罪華山之神攷同時死者尙有楊尙書守禮楊都御史邦奇馬光祿卿理李伯華詩所云平生三老友一夜委泥沙也諸公豈皆獲罪於神者邪事在嘉靖二十四年十二月十二日夜蒲州震尤甚山陰僖順王聰澍亦薨又輔國將軍四人承國將軍一人鎮國中尉十七人輔國中尉三人庶人五人縣主郡君淑人各一人夫人四人齊厭死伯華詩又云四方多變異詎止平陽哀戶曹倏降火涓流却逆洄山崩兼泉涌彗見復風霾犬育在鷄卵蛇出由人懷雨豆

血淋漓妖鳥羽毳毼虎產於猪腹人生自驚胎李樹忽結瓜多而更且魁夜見火城出蓮從上釜開妖孽如此天心可知而西苑君臣方以丹鼎青詞相尙祇見白龜白鹿頌瑞應者紛紛真可長太息也伯華詩太狗鄙以其紀事特詳故附錄以資史局述五行志者

又云宮婢楊金英欲斃世宗於熟寢以繩束帝喉未絕有張金蓮走告皇后往救獲甦此嘉靖壬寅年事也訊得同謀者楊玉香邢翠蓮姚淑翠楊翠英關梅秀劉妙蓮陳菊花王秀蘭徐秋花鄧金香張春景黃玉蓮凡一

十三人悉磔之於市王祭酒維楨孝烈方皇后輓歌云  
範內畱芳訓扶天有駿功仙游知跨鳳聖念爲當熊玉  
珮虛無裏蒼雲悵望中宜春花照眼淚灑舊時叢聖念  
當熊蓋指此也

劉繪字子素一字少質光州人嘉靖乙未進士授  
行人選戶科給事中轉刑科右給事中出知重

慶府有嵩陽春詠

潘恭定試士中州得子素卷曰此河岳英靈也子素旣  
釋褐給事省中偕同官壽貴溪貴溪手三碗行酒子素

揮之次日疏其十罪不報明年六月朔日食晝晦永陵  
大恐問天官主何占子素請去言以塞天怒言遂去位  
子素亦出守及言再相嶺南省論罷其大指謂飲酒酣  
歌自稱豪俠當場蹴踘旁若無人廣聚生徒而要譽多  
張讌會以滔淫旣歸田講范白之術取負郭水田疏爲  
大壑種魚萬頭牧馬山莊得良駒六十四匹又責僮往來  
徐揚貨布及鹽課入息以給賓客其答楊用修書云人  
情有所寄則有所忘寄而意不縱則忘之不遠惟忘之  
遠而後我無所貪無所貪而後能適蓋亦自道也與能

叔仁論文云仙釋二氏非聖之書吾既不從其道却借  
彼之言以資吾文所謂文者將何所爲乎爲文而雜以  
二氏語此唐宋間雜學之弊也昌黎不道二氏語與二  
氏言必舉六經之言告之子厚謂某秀才文多引莊列  
頗奪正氣論亦凜凜至與二氏言便盛稱其教而雜諸  
戒律毗尼之說却不自覺蘇氏記大悲勝相諸作至爲  
偈語準楞嚴法華大不宜也其持論甚正詩非所長比  
於伯華稍事裁翦

薛應旂字仲常武進人嘉靖乙未進士除慈溪知

縣轉南吏部主事歷浙江提學副使改陝西有  
方山集

方山以帖括擅長旣負時名遂專著述所續通鑑孤陋  
寡聞如王傅李燾楊仲良徐夢莘劉時舉彭百川李心  
傳葉紹翁陳均徐自明諸家之書多未寓目并遼金二  
史亦削而不書惟道學宗派特詳爾憲章錄一編似未  
覩實錄而成者若浙江通志簡畧太甚俾後之欲知前  
事者漫無考稽文獻不足徵是誰之過與昔劉仲原父  
謂可惜歐九不讀書覽方山遺編頗同此恨詩其餘藝

青志月言言 卷十二  
不必論也

施峻字平叔歸安人嘉靖乙未進士除南京刑部主事歷郎中出知青州府有漣川集

平叔以七律自詡閩黨交稱焉然殊不見好諸體過修邊幅未免氣餒顧箬溪序之謂唐以後詩音調格律相尙鍛鍊益工其氣益弱毋乃微辭也乎

袁煒字懋中慈溪人嘉靖戊戌賜進士第三授翰林編修歷侍講學士禮部右侍郎進尙書召入直改戶部加少傅兼太子太傅建極殿大學士

卒贈少師諡文榮有元峰集

永陵自壬寅宮婢之變卽移御西苑萬壽宮不復居大內先是嘉靖二年四月太監崔文等於欽安殿修設齋供請駕拜奏青詞此金錄青詞之萌芽也其後齋醮日盛一時詞臣以青詞受寵眷者甚衆而最稱旨者莫若袁文榮煒董尙書份如世所傳醮壇對聯云洛水元龜初獻瑞陽數九陰數九九九八十一數數原于道道通元始天尊一誠有感岐山威鳳兩呈祥雄聲六雌聲六六六三十六聲聲聞于天天生嘉靖皇帝萬壽無疆此

則文榮所撰也時禁中有貓微青色惟雙眉瑩潔名曰  
霜眉善伺帝意帝甚憐愛之貓死命以金棺葬萬壽山  
薦以齋醮文榮撰詞有化獅爲龍語因題碑曰虬龍冢  
云王秀才逢年上文榮書曰閣下以時文發甲科以青  
詞位輔相安知世有所謂古文者哉快意之言然未免  
直而無禮矣

查秉彝字性甫海寧人嘉靖戊戌進士除黃州推  
官徵授禮科給事中歷戶科左右給事中坐建  
言謫定遠典史稍遷建寧推官陞刑部主事改

吏部進郎中遷太常少卿改大理少卿轉太僕  
卿終順天府尹有覺菴存橐

京尹爲諸生時夢受杖暗室中仰見廟額懸天上春回  
四字後任戶科給事中上疏劾嚴嵩父子詔廷杖六十  
謫定遠典史恍惚前夢因賦詩云九重天上春回日二  
十年前夢裏身京尹爲今吉士慎行嗣堞高祖嘗出家  
集見示鈔撮數首近覓笥中散紙不得僅存長律一篇  
贈吳諫議奉使琉球云玉冊傳殊域天朝簡近臣漢官  
陳法從周禮貴王人橫海樓船使明河博望津長空浮

遠樹疊浪淨高旻馳傳祥飈護揚旌水怪馴彭湖晴似  
練天界雪如銀雨過龍宮曉雲開貝闕真千年存故國  
八葉沛恩綸異俗敷文教通儒羨席珍一新唐號令不  
數漢和親磊落凌霄氣昂藏報主身鳴珂期不遠民瘼  
陞前陳

周怡字順之寧國太平人嘉靖戊戌進士除順德  
府推官擢吏科給事中以言事受杖繫獄久得  
釋隆慶初起遷太常少卿及卒鄉人私謚莊簡  
先生天啓初追謚恭節有訥齋集

訥齋封事因翟巖二輔臣市恩修怨而發疏中有云陞  
下日事禱祀而四方之水旱災傷未能消也歲開納銀  
之例而府庫未能充也歲頒蠲租之令而百姓未能足  
也時下選將練士之命而邊境未能寧也深觸永陵之  
怒廷杖之下錦衣獄踰年乃釋既而與楊爵劉魁仍逮  
繫所著訥齋集大半獄中與爵等倡和作也

茅坤字順甫歸安人嘉靖戊戌進士除青陽知縣  
以憂歸補丹徒知縣徵授禮部主事改吏部左  
遷廣平通判陞南京兵部主事出爲廣西按察

僉事歷副使有白華樓玉芝山房老年諸橐

世傳唐宋八大家之目係鹿門茅氏所定非也臨海朱伯賢定之於前矣彼云六家者合三蘇爲一爾今文抄本大約出於王道思唐應德所甄錄茅氏饒於貴遂開雕以行卽其評語稱關壯繆爲關壽亭不亦刺謬甚與文旣卑卑詩亦庸鈍觀其酬酢多醫卜星相之流知非意所存也

喬世寧字景叔耀州人嘉靖戊戌進士繇南京刑部郎中遷四川按察僉事歷湖廣提學副使河

南參政終四川按察使有邱隅集

何仲默視學秦中景叔親受詩法譚必移日故其詩整而不浮可與許少華肩並餘茂有過焉者長安道云長安道直以迂環五城開九衢外羅天市拱皇居中懸日月耀金樞朱輪驄馬如流水長安道上禁馳驅誰家少年俠邪徒雄豪去天尺五餘白日殺人當路衢司隸過不問况乃執金吾人言輦轂之下朝犯法暮伏誅吁嗟此徒天日無霍家奴衛家奴春鴈云春風纔幾日江鴈已春聲關路何時返鄉愁爲爾生望窮遙漢影不盡倚

樓情却憶金河北人同出塞行

王問字子裕無錫人嘉靖戊戌進士除戶部主事歷郎中遷廣東按察僉事以父老請歸及卒門人私謚曰文靜先生有仲山詩選祗役橐原筮齋集崇文館橐

仲山兼擅畫書詩畫多游戲詩不起草五言平衍者多歌行稍覺頓挫近體亦嫌率易越縑宣紙流徧人間披覽手書或與集中詩有異由其才多下筆不能自休字句轉易皆於俄頃也

俞憲字汝成無錫人嘉靖戊戌進士歷官湖廣按察使有遼海金陵蓬萊轍下外臺去楚當奕諸集

汝成手輯盛明百家詩足稱好事而甄綜未當舍彼蘭蕙反存葑蕀卷首題識都不成文

陸樹聲字與吉松江華亭人嘉靖辛丑會試第一改庶吉士授編修累官禮部尙書卒贈太子太保謚文定有集

平泉在史館相嵩壽日同館皆更緋衣入賀公獨青袍

立嵩目懾之不爲意也其後定陵踐位卽家拜禮部尙書江陵將援之入閣授以意佯爲不覺竟托疾歸江陵大慍比歸遂不復出天下高之卒時年九十有八與魏文靖同洵人瑞也

王崇古字學甫蒲州人嘉靖辛丑進士除刑部主事累官右僉都御史巡撫寧夏以兵部右侍郎兼僉都御史總督三邊以右都御史總督宣大加太子少保進兵部尙書召入協理戎政加少保卒贈太保諡襄毅有山堂彙橐

襄毅詩格聳高橫槩自喜然按之不無懦響登鐘山戍樓云危樓高結跨飛虹古塔峻嶒對梵宮北去關河連塞上西來風物自秦中洞門暗向前山轉石井深連幽澗通扼險應期追一范不堪搖落成煙空

萬士和字思節宜興人嘉靖辛丑進士歷官禮部左侍郎卒諡文恭有萬文恭公摘橐

履菴出荆川之門詩派從其師指授然荆川集中罕存酬和之作故履菴有姓名不挂更何論之句及督學貴陽以後詩另入一格荆川乃許之曰讓汝出頭蓋荆川

初入館局詩學初唐晚年效邵堯夫謂其天機自動未免頽然自放矣履菴雖宗擊壤而習染未深觀其黔南諸作頗有似柳柳州者烏撒道中云地當高處峰隨轉雲到窮時路更賒夏半火刀方佈種晚來牛馬不歸家瘴煙寒鎖蠻村樹嵐霧晴迷客子槎干羽未能馴鬼國祇貪關市中鹽茶

洪朝選字舜臣同安人嘉靖辛丑進士歷官刑部

右侍郎有芳洲集

舜臣強直自遂爲勞堪羅織斃之獄中士林多爲扼腕

時王道思唐應德輩銳意古文辭舜臣雖不與八才子之列而實聯鑣並驅道思與李中溪書云吾鄉洪芳洲先生文直得韓歐曾王家法吾輩駁雜視之有媿其傾倒至矣詩非擅長

李時行字少偕番禺人嘉靖辛丑進士除嘉興知

縣徵授南京兵部主事有青霞集

少偕罷官歸里與梁公實黎維敬歐楨伯吳蘭臯結社稱南園後五先生其詩體格雖卑然亦清穩無叫囂之習別吳山人擴云客中仍送客離思渺難任岐路一尊

清江雜言 卷十二  
酒故人千里心歸雲衝落雁寒角亂秋砧湖海風塵裏  
前期何處尋

任環字應乾長治人嘉靖甲辰進士歷官山東右  
參政卒贈光祿寺卿

倭人入犯任公大小數十戰功最多歸熙甫詩云江南  
列郡盡乘城藏穴何人肯出兵惟有使君躬擐甲劉家  
港口看潮生公軀瘦瘠倭人目曰瘦官人望而避之詩  
特其寄興然亦明淨和張石川野航云蘆花汀畔獨移  
艖一曲滄浪興杳然已付世情流水外遂令心事老江

邊閒憑魚浪傳書帖淨愛鷗沙占酒筵便與先生訂幽  
約乘槎直欲犯青天

張才字茂參西安衛人嘉靖甲辰進士歷官按察  
僉事

元美評茂參詩比之荒僮渡江茂參之言曰自六義輟  
講而詩教寢衰五傳異觀而文體漸裂今昔殆不相及  
矣務艱者氣鬱而不信樂易者神渙而弗耀侈博者意  
累而靡潔至或思不通圓而極貌摹倣識未周洽而委  
心剽斂支戾勿經踳駁可厭篇帙雖富豈足稱哉其意

亦似不滿於瑯琊歷下二子度其集必有可觀而惜其罕傳里有姚叟澣曾問蒙叟茂參何名蒙叟不能答則其論詩之旨聞之者益鮮矣

附錄王元美云張茂參如荒僮渡江揖讓簡畧故是中原門第

劉鳳字子威長洲人嘉靖甲辰進士官至河南按

察僉事有澹思太霞二集

子威局守于鱗唐無古詩一語歎爲知言其詩襞積纂組節節俱斷俾讀者茫然如墮雲霧中吳趨士風清嘉

不意出此鈍漢所著澹思太霞二集類一時顯名者序之盛相揚詡而吳市賣卜人袁孟逸每向人挾摛其字句鈎棘文義紕繆者以爲姍笑子威聞而大怒愬之有司有司旣撻之而數之曰若敢復姍笑劉侍御詩文邪伏地對曰民寧更受笞數十不能妄諛劉侍御也蓋草野之公論尙存勝於士大夫曲徇多矣

朱曰藩字子价寶應人嘉靖甲辰進士除烏程知


縣遷南京刑部主事改兵部轉禮部郎中出知

九江府有山帶閣集

升之詩倣北地子价則法用修其在金陵懸用修畫像  
於寓齋焚以東官香薦以陽羨茶賦人日草堂之詩與  
唐李才江尊賈浪仙爲佛事絕相類然其詩實與用修  
派遠由其牽絲西吳蓋心慕蔡白石故爾



靜志居詩話卷十二



70014587

